



piše: Zoran Lešić  
foto: Mirjana Blažević Lešić

## ESENCIJA PRIJATELJSTVA SKUPLJENA U FLAŠICE

# Memorija

# Vode

**N**i smo sudbinski vezani za vodu. Radamo se iz plodne vode i naš organizam je većinom sastavljen od vode. Civilizacije su se razvijale uz rijeke i česte su teorije da voda, ustvari, prenosi informacije kroz vrijeme i prostor. Istraživanja Aerospace instituta sa Univerziteta u Stuttgartu podržavaju teoriju da voda ima memoriju. U nizu testova otkrili su da svaka čestica vode ima jedinstven karakter koji reflektuje vibracije onoga čemu je bila izložena. U jednom od ispitivanja, koristeći isti izvor vode, grupa različitih ljudi napravila je prstima po kap vode. Rezultat eksperimenta pokazao je da su sve napravljene kapi naizgled bile iste; ali gledane pod mikroskopom, kap svakog pojedinca izgledala je potpuno drugačije od kapi ostalih učesnika. Svaki pojedinac je stvorio unikatnu kap koja je prenosila njegov "otisak", memorisala individualne emocije i pamtila svijet kojemu je bila izložena. Ovu teoriju podržava i dr. Masuro Emoto, koji ide korak dalje tvrdeći da se molekularna struktura vode mijenja pod utjecajem naših vibracija, bilježeći sve što mislimo, kažemo ili osjećamo. Ova ideja bi mogla promijeniti naš način gledanja na svijet. Ponukana tom teorijom Mirjana Blažević Lešić je odlučila da napravi umjetnički projekat/instalaciju i evo njenog teksta iz kataloga povodom ovogodišnje februarske izložbe u Hagu.

*Foto projekat "Voda i sjećanje" krenuo je od naučne pretpostavke da voda posjeduje inteligenciju, svijest i fotografsko pamćenje. Voda čisti, oživljava i povezuje ljude bez obzira na geografske, jezičke, političke, rodne i ostale barijere, kao što to i sama umjetnost čini.*

*Ideja rođena uz Neretvu, rijeku mog djetinjstva, projekat realizovan u Sarajevu, a premijera održana u nizozemskom pitoresknom gradiću Hoofddlaap, u bivšem karantenu za mornare (koja slučajnost), a danas galeriji i rezidenciji mojih dragih prijatelja, umjetnika Inge i Glenna Priestera.*


*U Sarajevu sam provela pet toplih ljetnih dana sa svojim prijateljicama, prskala ih hladnom sarajevskom vodom, fotografisala i sa njihovih lica skupljala u flašice magične kapljice koje pamte njihovu ljepotu, prijateljstvo i kreativnost. Zajedno smo ušle u začarani svijet stvaranja u kome nam je voda postala prijatelj i partner u igri. Sa ljubavlju smo se podsjetile i na zajedničke projekte, njihovu ljepotu, snagu, humor i sjaj. Voda prikupljena s lica mojih kreativnih prijateljica krenula je u novi život. Konačno, moje drugarice su sa mnom zauvijek, ne dam im da odu. One me gledaju sa fotografija, njihov smijeh odzvanja mojom terasom. Sve to me pokreće, daje mi snagu... I u ovom vremenu "prisilne izoliranosti", ja otvorim flašice sa vodama mojih kreativnih prijateljica, pustim da njihova kap dodirne moju kožu i tada kao da su me dotakle, osjetim njihovu ljubav, prijateljstvo, povjerenje...*

*Budite i vi odlučni da, kao i te malene razigrane kapljice vode, na temelju vlastite intuicije i osjećaja, slijedite jedini ispravni put:*

*„PUT PRIJATELJSTVA!“*



Mirjana





*Adisa*



*Ivona*

*Jasmina*



*Miranda*





*Mojca*



*Rejhana*

*Stela*



*Željka*